

aux trois Riuieres, ce qu'il a fait: Voicy ce qu'on m'en escrit.

Les Attikamegues ou poiffons blancs, c'est le nom de ceux de ceste nation, font descendus aux trois Riuieres; ie les ay vn peu instruiçts, ils m'ont fort contentez; Vn vieillard entre autres nous a si bien presé, que nous luy auons accordé le Baptesme; c'est le pere de Iacques 8Passeigã, que nous baptifames l'an pafsé, ce pauure garçon a perseueré en la Foy, encor qu'il fut bien elloigné de nous, il a enseigné son Pere, & se voyant surpris d'une grosse maladie, il luy recommanda à la mort de nous venir trouuer pour le faire instruire, il m'a estonné; il estoit attentif [63] à merueille: Voila, disoit-il par fois, ce que ie deuois sçauoir il y a long-temps, iufques icy ie n'ay pas vescu, ie reffemblois à vn mort, mon fils a commencé à me donner la vie; haste toy mon fils, disoit-il au Pere, de m'instruire, & de me baptifer, car ie ne veux pas aller dans le feu.